

## **АКАФИСТ ВОЗДВИЖЕНИЮ ЧЕСТНОГО КРЕСТА ГОСПОДНЯ**

### **Кондак 1**

Приидите, христоименитии люди, составим похвалу Честному Кресту, на нем же Христос, Царь славы, руце распростер, возведе нас на первое блаженство, из негоже низпадохом прелестию змиевою. Ты же, о пресвятый Кресте, яко имеяй присущую тебе силу Распятаго Христа, спасай и сохраняй от всяких бед любовно зовущия ти: Радуйся, Честный Кресте, всерадостное знамение нашего искупления.

### **Икос 1**

Ангелов лица, яко Божии служители, Крест обстояще, вольную страсть Христа Жизнодавца прославляют. Мы же страданьми Того вечныя смерти избавльшеся, подражая горним силам, радостно взвываем:

Радуйся, Кресте, яко на тебе Христос Бог наш, волею руце распростер, спасение наше содела; радуйся, яко распростершимся на тебе Христом преступление Адама и Евы, простерших руце ко древу запрещенному, упразднился.

Радуйся, яко воздвижену бывшу на тебе, аки преступну, Законодавцу, древняя клятва, яже на нас бывшая, потребися;

радуйся, яко содеявшимся на тебе странным таинством род человеческий от тли смертныя свободися.

Радуйся, яко Пострадавшим и Умершим на тебе жало смерти сокрушился; радуйся, того ради страдания Бог с человеки примирися.

Радуйся, Честный Кресте, всерадостное знамение нашего искупления.

### **Кондак 2**

Видя падших человеков, Господи, Ты вочеловечився, крест и смерть вольно плотию претерпел еси за род наш, да от смерти вечныя избавиши исповедающие Тя, Сына Божия и вопиющие Ти: Аллилуйя.

### **Икос 2**

Разум человеч изнемогает в постижении велия тайны Твоего, Христе, воплощения и вольного за ны страдания: како Ты, Бог сый безстрастный, страсть крестную, яко человек, претерпел еси и сие орудие смерти Твоей соделал еси источником жизни и спасения всем благочестно в Тя верующим и хвалебно воспевающим:

Радуйся, Кресте, на немже содеяся таинство, от века предопределенное;

радуйся, яко на тебе совершился наше искупление, многообразне во образех и сенех предъявленное.

Радуйся, яко умерый на тебе Жизнодавец, кровь и воду источи, имиже грехи наша омываются; радуйся, яко каплями святейшей крове Его греховныя струпы душ наших очищаются.

Радуйся, Кресте, якоже древо животное, еже есть посреде рая Божия, христианом

вожделенный;  
радуйся, плодами бессмертия умно нас питающий и надеждою жизни вечныя малодушие наше ободряющий.  
Радуйся, Честный Кресте, всерадостное знамение нашего искупления.

### **Кондак 3**

Крест Твой, аще и древо видимо есть существом, но Божественною одеяно есть силою, и чувственное мира выявляемо умно наше чудотворит спасение, подвизая пети Тебе: Аллилуия.

### **Икос 3**

Имуще пред очима нашима Крест пресвятый, святолепным поклонением той почитаем распеншагося ради на нем Спаса Христа, и лобызающе взвываем:  
Радуйся, Кресте, прославленный послушанием и страданием Христовым;  
радуйся, возвеличенный возвышением на тебе Сына Божия, Иже весь мир от падения Адамля воздвиже.  
Радуйся, яко сбывшагося на тебе ужасного таинства земли ужасеся и вострепета, аки бы хотящи поглотити законопреступныя;  
радуйся, яко заклавшуся на тебе Агнцу Божиу завеса храма раздрася и жертва ветхозаветная упразднися.  
Радуйся, Кресте, яко распадшуся под тобою камню, каменносердечни роди еврейстии неверием от Бога отпадоша, благодати же священства и царства лишишася;  
радуйся, яко омрачившуся солнцу в страсти Христовой нощь многобожия прейде и свет веры возсия.  
Радуйся, Честный Кресте, всерадостное знамение нашего искупления.

### **Кондак 4**

Бурею злобы дышуще и завистию движими, первосвященницы иудействии скрыша в землю Крест Твой, Христе Боже, да не будет обличением безумие их; но той, яко сокровище драгое, из недр земли возсия, тщанием благочестивыя царицы Елены обретенный и на радость всему миру явленный, с Богокрасною песнию: Аллилуия.

### **Икос 4**

Видевше тогда христианстии людие честнаго Креста обретение, прославляху распеншагося на нем Христа Бога, «Господи, помилуй» взывающе. Мы же ныне, подражающе им, прославляем Крест Его святый хвалеными сицевыми:  
Радуйся, Кресте, в землю сокровенный и оскверненное грехами наше естество земное освятивый;  
радуйся, явлением своим из недр земных хулителей воплощения и Божества Христова посрамивый.  
Радуйся, яко Пострадавый на тебе плотию прия всяку власть на Небеси и на земли, да всех и вся к Богу Отцу приведет;

радуйся, яко Умерый на тебе яко человек силою Божества Своего сокруши заклепы ада и изведе оттуда души праведных.

Радуйся, Кресте, яко разбойник благоразумный, Христу сраспявыйся, Того исповедавый, тобою, аки лествицею, на Небеса взыде;

радуйся, яко и всех отсечением страстей Христу сраспинающихя возводиши в Царствие Небесное.

Радуйся, Честный Кресте, всерадостное знамение нашего искупления.

### **Кондак 5**

Господи, при Моисее иногда пророце точию образ Креста Твоего являем побеждаше врази Твоя, ныне же самый Крест Твой имуще, помощи просим: укрепи Церковь Твою и даруй ей победы на враги, да расточатся вси врази Твои, не вопиущии Ти: Аллилуия.

### **Икос 5**

Честного Креста, Христе, действие прообразив Моисей, победи Амалика в пустыне Синайской: егда бо простираше руце, креста образ творя, укрепляхуся людие; ныне же все вещей сбытие в нас исполнися: днесь Крест воздвигается, и демоны бегают, днесь тварь вся от тли свободися, яко вся Креста ради возсияши нам дарования. Темже, радующеся, вопием:

Радуйся, Кресте, оружие Христово страшное, егоже демоны трепещут;

радуйся, яко силою на тебе Распятаго Христа бесовстии полчища далече прогоняются.

Радуйся, яко силою действующия в тебе Божественные благодати победы на сопротивныя христолюбивым людем даруются;

радуйся, яко от тебе, яко высокоросленнаго и многоплодовитаго древа Христова на тебе страдания, плоды жизни и спасения нам произрастают.

Радуйся, Честный Кресте, всерадостное знамение нашего искупления.

### **Кондак 6**

Проповедником силы и Божества Христова явися иногда животворящее древо Крестное, егда прикосновением своим воскреси мертваго и к жизни возведе его, еже видевше, мнози от иудей и язык познаша велию благочестия тайну: яко спасения ради человеческаго, Бог во плоти явися и страсть крестную претерпе, да спасет вопиущия Ему: Аллилуия.

### **Икос 6**

Яко же древо райское превелие, возвысиya на Голгофе честный Крест Христов, отонудуже во всю вселенную распростре мысленныя ветви благодати и Распеншагося на нем: под егоже сению обретают прохладу палимии зноем страстей и хотяющи благочестно жити о Христе Иисусе. Темже и мы, благодати Того причастницы, весело взвываем:

Радуйся, святый Кресте, деревом жизни, Адама ради в Едеме насажденным, проображеный;

радуйся, новым Адамом, руце на тебе распростершим, миру явленный.

Радуйся, яко под сень благодатнаго защищения твоего вси вернии прибегают;

радуйся, яко милосердием Даровавшаго нам тебе кающиися грешницы огня геенского

избегают.

Радуйся, Кресте, утешение наше в скорбех и печалех;  
радуйся, живительная отрадо и помощь изнемогающим в борьбе с прилогами страстей, мира и  
диавола.

Радуйся, Честный Кресте, всерадостное знамение нашего искупления.

## **Кондак 7**

Хотя явити роду человеческому благости и милосердия Своего неизследимую пучину, Крест  
Твой, Господи, дал еси нам тверда блюстителя и прогонителя демонов. Темже вси мы, иже в Тя  
верующии, прославляем величие страсти Твоей, благодарно поюще Тебе: Аллилуия.

## **Икос 7**

Дивны дела явил еси, Господи, Крестом Твоим честным: распеншуся бо Ти на том плотию, вся  
тварь изменися: солнце лучи своя сокры, основания земли восколебахуся, ад сокрушился  
державою власти Твоей и изведе юзники, яже от века содержал есть. Сего ради увязаем той  
сими песненными цветы:

Радуйся, Кресте, яко пострадавшему на Тебе вся тварь сострадаше, яко Творцу своему и  
Владыце;

радуйся, яко силу Того и Божество свидетельствоваху солнце помрачением и земля  
колебанием.

Радуйся, яко Умерый на тебе недержан бысть в мертвых, но, разрушив державу смерти, в  
третий день воскресе;

радуйся, яко воскресшу Тому проповедь евангельская, от лика апостольского наченшаяся, во  
вся концы земли изыде.

Радуйся, Кресте, яко тобою кумирослужение и многобожие языческое упразднися;  
радуйся, яко тебе ради правая вера во Единаго Бога, в Троице славимаго, по всей земли  
утвердися.

Радуйся, Честный Кресте, всерадостное знамение нашего искупления.

## **Кондак 8**

Странно Бога вочеловечшася и на Кресте распята бывша мысленно видяще, устранимся  
суетного мира, ум на Небеса преложше. Сего ради Бог на землю снide и на Крест взыде, да тем,  
аки лествицею, на Небеса возведет вопиющая Ему: Аллилуия.

## **Икос 8**

Днесь Адам со Евою веселится, предлежащий видяще Крест, имже поражен бысть супостат,  
иже древле в раи вкушением запрещенного плода тех прельстивый и пленники себе  
створивый. Темже и мы, срадующеся праотцем нашим о избавлении от пленения нашего  
душевнаго, благоговейно воспеваем:

Радуйся, Кресте, яко на тебе Пастырь добрый душу Свою положи за овцы Своя и даже до ада  
снide, ища заблудших;

радуйся, яко Той не презре дело руку Свою, Адама со Евою, но со инеми праведники исхити я из ада, яко из челюстей зверя крепкаго, и в рай всели их.

Радуйся, яко на тебе пригвожденному Христу пламенное оружие плеши даде и Херувим, Едем хранящий, отступи от древа жизни;

радуйся, яко мы, ныне Крещением возрожденнии, во Христе новые людие, невозбранно причащаемся райских пищи.

Радуйся, Кресте, жезле силы Христовы, от Сиона посланный, имже мы пасемся на пажитех евангельских учений;

радуйся, яко тобою невредими сохраняемся от волков душегубных, яко львове рыкающих и ищащих, кого поглотити.

Радуйся, Честный Кресте, всерадостное знамение нашего искупления.

### **Кондак 9**

Всяких бед и козней вражиих избави ны, Кресте треблаженный, яко приемый благодать и силу от пригвожденного на тебе Христа, Ему же яко Богу и Избавителю нашему благодарственно и хвалебно поем: Аллилуия.

### **Икос 9**

Ветийство всякое земнородных не довлеет к прославлению Креста Твоего, Господи, на немже спасение наше соделал еси; темже, недоумевающе восхвалити той по достоянию, взываем сице:

Радуйся, Кресте, яко вознесенный на тебе Спас мира мнози люди в познание Свое призыва и до ныне призывает;

радуйся, яко возсиявый на тебе, аки на свещнице, Свет истинный вся концы земли светом Боговедения озаряет.

Радуйся, яко ныне Восток и Запад Пострадавшаго на тебе прославляют;

радуйся, яко и тя, яко подножие Христово, вси верни, возносяще, прославляют.

Радуйся, яко от тебе, яко от неизсякаемаго источника, христоименитии людие обилие благ вечных почерпают.

Радуйся, Честный Кресте, всерадостное знамение нашего искупления.

### **Кондак 10**

Спастися хотящим нам и под сень защищения твоего прибегающим, буди помощник, пресвятый Кресте, сохраня ны от всех зол силою на тебе Распятаго Христа, Ему же яко Богу и Избавителю нашему благодарственно и хвалебно поем: Аллилуия.

### **Икос 10**

Стена еси, ограждающая нас от бед и напастей, Кресте всечестный, и столп крепкий противу лица вражия, к немуже невидимии борителю приступити не смеют, боящеся взирати на силу Твою. Сего ради с верою ограждаемся святым твоим знамением и весело воспеваем:

Радуйся, пречестный Кресте Христов, от нападения духов злобы нас защищай;  
радуйся, от различных стрел их невредимы ны сохраняй.  
Радуйся, яко от знамения твоего, с верою благочестно творимаго, вся силы ада, яко дым от  
ветра, исчезают;  
радуйся, яко тобою вся крепость их, яко воск от лица огня, истаивает.  
Радуйся, яко святии мученицы, знамением твоим ограждашеся и имя Христово призвавше,  
всякий, вид мучений мужественно претерпеша;  
радуйся, яко преподобнии отцы помошию силы Божества, знамению твоему присущия,  
бесовская страхования и страстей возстания победиша.  
Радуйся, Честный Кресте, всерадостное знамение нашего искупления.

### **Кондак 11**

Пение всеумиленное приносим Ти, всечестный Кресте, и смиренно молимся распятому на тебе  
Христу Богу нашему, Иже дарова нам тебе во отраду и утешение в скорбех, да страстию Свою  
избавит нас от страстей душевредных и научит благоверно воспевати Ему: Аллилуйя.

### **Икос 11**

Светом благодати Божией, таинственне ти присущия, просвети наша душевная чувствия, Кресте  
пресвятый, да тою озаряеми и наставляеми, не поткнемся о камень соблазна, но да возможем  
путем заповедей Божиих правошествовать во всей жизни нашей, воспевающе ти сице:  
Радуйся, непрестающих чудес Христовых вестниче и милосердия Его к роду человеческому  
проповедниче;  
радуйся. Кресте, рода человека обновление и Нового Завета Христова печать и утверждение.  
Радуйся, торжество веры христианского и благонадежный якорю упования нашего;  
радуйся, святых храмов Божиих украшение и домов благочестивых ограждение.  
Радуйся, полей и вертоградов благословение; радуйся всех стихий освящение.  
Радуйся, Честный Кресте, всерадостное знамение нашего искупления.

### **Кондак 12**

Благодать Твою всемощную подаждь нам, Господи, да последуем Тебе, Владыце нашему,  
взмеше крест наш, не гвоздьми пригвождающеся тому, но трудами, воздержанием и  
смирением, да тако причастницы будем страданий Твоих, от нихже истекают потоцы Жизни  
Вечныя, напаяющая вся правоверныя, благочестно поющия Ти: Аллилуйя.

### **Икос 12**

Поюще величие твое, всечестный Кресте, восхваляем тя вси, яко победоносный скипетр Царя  
Небесного, нашего же спасения всерадостное знамение, темже и вопием:  
Радуйся, Кресте, православных христиан державо и несокрушимое их ограждение;  
радуйся, святителей украшение и всех подвижников веры и благочестия сила и подкрепление.

Радуйся, Кресте, от колыбели и до гроба на всех путех жизни нас ограждаяй и по смерти на воздушных мытарствах от духов злобы нас защищаяй;  
радуйся, яко под знамением твоим почивающии, умершии в вере и благочестии, в последний день воскреснут в жизнь вечную.

Радуйся, Кресте, явлением своим на Небеси предварити имый славное Второе пришествие Христово;  
радуйся, яко распеншии Христа и вси невернии узрят тя тогда и горце возрыдают, любящии же Господа, зряще тя, вельми возрадуются.  
Радуйся, Честный Кресте, всерадостное знамение нашего искупления.

### **Кондак 13**

О Пречестный и Животворящий Кресте Господень, всех христиан утешение! Тя ныне предлежаща видяще, возводимся мыслию к распятому на тебе Христу, Ему же и молимся смиленно, да тебе ради помилует нас, грешных, и сподобит в селениях райских воспевати Ему: Аллилуия.

(Этот кондак читается трижды, затем икос 1 и кондак 1)

### **Молитва**

Кресте честный, хранитель души и телу буди ми: образом своим бесы низлагая, враги отгоняя, страсти упраздня и благоговение даруя ми, и жизнь, и силу, содействием Святаго Духа и честными Пречистыя Богородицы мольбами. Аминь.